

15 FEB 1998

Sultan - Keputeraan

SULTAN TIDAK MAHU KARENAH BIROKRASI SEBABKAN PELABUR LARI

ALOR SETAR, 15 Feb (Bernama) -- Sultan Kedah hari ini bertitah supaya karenah birokrasi segera diatasi bagi mengelakkan pelabur-pelabur yang sudah komited di negeri ini beralih ke negeri lain akibat kelemahan sistem pentadbiran.

Baginda bertitah segala bentuk karenah birokrasi seperti kelewatan memproses pelan-pelan pembangunan dan persoalan untuk mengeluarkan Sijil Layak Menduduki perlu diberi perhatian sewajarnya.

"Usaha lebih gigih diperlukan bagi menarik lebih ramai lagi pelabur asing ke negeri ini," titah baginda pada Istiadat Penganugerahan Darjah-darjah serta Bintang-bintang Kebesaran sempena Hari Keputeraan baginda ke-70, di Istana Anak Bukit, di sini.

Baginda bertitah penyediaan kemudahan infrastruktur termasuk sistem telekomunikasi moden yang sempurna harus diberi keutamaan.

Baginda juga mengajak rakyat "berakit-rakit ke hulu sebelum berenang-renang ke tepian" dalam menghadapi kegawatan ekonomi sekarang dengan "bersakit-sakit dahulu sebelum bersenang-senang kemudian".

Turut hadir pada majlis ialah Sultanah Kedah, Perdana Menteri Datuk Seri Dr Mahathir Mohamad yang juga Anggota Parlimen Kubang Pasu dan isteri Datin Seri Dr Siti Hasmah Mohd Ali.

Baginda kemudian berkenan menganugerahkan darjah dan bintang kebesaran kepada 52 daripada 871 orang penerima.

Terdahulu, Menteri Besar Tan Sri Sanusi Junid semasa menyampaikan Ucapan Tahniah bagi pihak Kerajaan Negeri dan rakyat, berkata Kedah menarik pelaburan berjumlah RM4.59 bilion tahun lepas.

Beliau berkata sektor pelancongan menarik lebih dua juta pelancong ke negeri ini tahun lepas dengan kebanyakannya pelancong tempatan.

Sanusi juga berkata papan iklan mempromosikan Pulau Langkawi akan didirikan di suatu tempat di antara Jeddah dan Mekah tidak lama lagi dalam usaha untuk menarik lebih ramai pelancong luar negara.

Selain itu kadar kemiskinan di Kedah dijangka berkurangan kepada lapan peratus pada tahun 2000 berbanding 30 peratus pada 1990, katanya.

Beliau berkata bilangan penduduk termiskin di negeri ini telah berkurangan dari 14,150 orang pada 1993 kepada 5,489 orang tahun lepas. --

BERNAMA

JM NAK